



ANG Paghimakas

Pabayagan sang Partido Komunista sang Pilipinas ★ Isla sang Negros

Ginaubayan sang Marxismo-Leninismo-Maoismo ENERO 2023

Isulong paabante ang inaway banwa inspirado ni Ka Ericson Acosta kag tanan nga mga baganihan kag martir sang bag-o nga demokratikong rebolusyon!

*Komiteng Rehiyunal sang Partido sa Isla sa Negros
Disyembre 7, 2022*

"Isulong..." sundan sa pahina 2



AP Kaundan

Isulong paabante ang inaway banwa inspirado ni Ka Ericson Acosta kag tanan nga mga baganihan kag martir sang bag-o nga demokratikong rebolusyon!, p1
Pinakamataas nga pagpanginbulahan sa mga baganihan sang masang mangunguma, p5
Pinakamataas kag mapula nga pagsaludar kay Ka Ericson Acosta, p6
Magakabuhi ka kaupod namon tubtob sa katapusan!, p7
Paghanduraw sa Kaupod, p8

"Isulong..." halin sa pahina 1

ANG KOMITENG REHIYUNAL SANG PARTIDO sa Isla sa Negros (KRPIN) nagahatag sang pina-kamataas nga rebolusyonaryo nga pasidungog kay Ericson "Ka Fredo" Acosta, 50, nga tigtib-ong sang kawsa sang mga mangunguma kag mamu-mugon sa kaumhan sa isla sang Negros. Mataas ang amon pagsaludo sa iya sa pag-upod niya sa listahan sang mga martir kag baganihan sang bag-o nga demokratikong rebolusyon kaangay sa iya pinalangga nga asawa, Kerima "Ka Ella" Tariman-Acosta, nga nagsunod sa dungganon nga mga baganihan sang una nga Rebolusyon Pilipino. Amon man ginapasidunggan si Joseph Jimenez, 52 para sa iya malawig nga tinuig nga pagserbisyo sa kahublagan mangunguma kag matutom nga panin-dugan sa paghimakas para sa matuod nga repor-mang agraryo.

Si Kaupod Ericson Legaspi Acosta mapintas nga ginpatay sang mga pasistang soldado sang 94th kag 47th *Infantry Battalion* sang *Philippine Army* sa kaagahon sang Nobyembre 30, 2022, samtang ang bug-os nga pungsod nagahanda sa pagsaulog sa anibersaryo sa pagkabun-ag sang proletaryadong baganihan kag amay sang Ka-tipunan, Gat Andres Bonifacio. Ginkuha si Ka Fredo upod sa lokal nga tig-organisa sang mangu-nguma nga si Joseph Jimenez sang mga mangtas

nga ido-militar sa isa ka balay sang mangunguma sa Sitio Makilo, Barangay Camansi, Kabankalan City, Negros Occidental kag ginpatay sila sa pinakamakasiligni nga pamaagi. Nag-angkon sila sang madamu nga pilas halin sa pagpangbuno kag paglabo, mga pilas bilang resulta sang grabe nga pagkastigo, kag mga pilas tungod sa pagtiro sa ila.

Kami naga-upod sa kasubo sang mga pamilya, mga abyan, mga kaupod kag tanan nga ginapigos kag ginahimuslan nga masa nga ang ila siglo-ang-kalawigon nga paghimakas naghorma kay Ka Fredo nga mangin isa ka dungganon nga proletaryo. Dugang pa, nagapanindugan kami nga amon itransporma ang amon kaakig kag kasubo sa isa ka militante nga kaisog kag determinasyon nga mag-pamatuk sa yawan-on kag kontrarebolusyonaryo nga plano sang rehimen US-Marcos II nga pukanon ang rebolusyonaryong kahublagan sa isla sang Negros kag isulong paabante ang inaway banwa inspirado sang amon mga baganihan kag martires pareho ni Kaupod Ericson Acosta.

Kami nagapasalamat sa mga mensahe kag handurawan nga ginpaambit sang malapit nga mga abyan kag kaupdanan ni Ka Fredo nga ginbalikan ang iya kabuhi sa Unibersidad sang Pilipinas-Diliman, ang iya pagkamuklat bilang aktibista kag mamu-mugon pangkultura sa tunga sang pinaka-importante

"Isulong..." sundan sa pahina 3

Ang nagahiusa nga kaundan sang mga mensahe amu ang pagka-lehitimo sang paghimakas sang katawhan Pilipino nga ginbun-ag sang dunot nga mala-pyudal kag mala-kolonyal nga sosyedad nga nagtiklod sa isa ka mamalaybay kag artista kaangay kay Ericson Acosta nga mag-usoy sa banas sang rebolusyon.



ENERO 2023

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.

ANG **Paghimakas**



angpaghimakas@protonmail.com



negrosrevportal.wordpress.com

"Isulong..." halin sa pahina 2

nga paghimakas sa pungsodnon demokratikong kahublagan kag ang iya pagkaluto bilang lubos-panahon nga rebolusyonaryo. Ang nagahiusa nga kaundan sang mga mensahe amu ang pagka-lehitimo sang paghimakas sang pumuluyong Pilipino nga ginbun-ag sang dunot nga mala-pyudal kag mala-kolonyal nga sosyedad nga nagtulod sa isa ka mamalaybay kag artista kaangay kay Ka Ericson Acosta nga mag-usoy sa banas sang rebolusyon.

Sang 2018, si Ka Fredo, kaupod ni Ka Ella, nag-abot sa Negros nga resolbado nga makigbahin sa inaway banwa sa isla. Nangin katapu siya sang Kalihiman kag Komiteng Tigpatuman sang KRPIN. Maukod niya nga gintib-ong ang Ikatatlo nga Kahublagan Panadlong sa lima ka tuig nga programa sang KRPIN kag may importante siya nga papel sa pagpapagsik ideolohikal, pulitikal kag organisasyunal sini sa tunga sang mga masingki nga opensiba sang kaaway kag kontrarebolusyonaryo nga kampanya.

Si Ka Fredo isa sa mga nagapanguna nga kadre nga nagpatigayon sang madinalag-on nga pagtalakay kag pagdihon sang 25 ka tuig nga pagsuma sang rebolusyonaryong inagihan sang rehiyon kag dokumento sini sa Sosyal nga Imbestigasyon kag Pag-analisa sa Sahi nga nagserbe agud padayon nga magligon ang paghiliusa sa tunga sang mga kadre kag katapu sang Partido.

Personal nga ginpamunuan ni Ka Fredo ang pila ka pulong pagtuon kag mga kumperensya sa Abante nga Kurso sang Partido kag iban pa nga Pangpartido kag pulitikal nga kurso nga malapit sa mga kampo sang kaaway kag sa ila mga operasyon kombat. Nagsulat siya sang pila nga in-



struksyunal kag teoretikal nga mga materyales kag naghatag sang napanahon kag husto nga giya agud mapa-uswag kag masistematisa pa ang Pangpartido kag pulitikal nga hilikuton pang-edukasyon sa rehiyon.

Angkon ang manggad sang kinaalam, talento kag inagihan sa rebolusyonaryong kultura kag propaganda nga hilikuton, ginduso man ni Ka Fredo ang regular nga pagpa-guwa sang Ang Paghimakas, pamantalaan sang CPP Negros, kag ang paglunsar sang *literary folio* sini, ang *Ispadding*.

Bilang rehiyunal nga kadre kag konsultant sang *National Democratic Front of the Philippines* (NDFP) sa Kumprehensibong Kasugtanan sa Sosyal kag Pang-ekonomiya nga Reporma (CASER), nagtrabaho siya upod sa iban nga mga kadre sang Partido kag mga lokal nga organisasyon masa sa pagpasingki sang mga kontrapudal nga paghimakas masa sa isla kag, subongman, mga kontra-pasista nga mga kampanya. Ang pagdeploy kay Ka Fredo kag Ka Ella sa isla sa Negros nagsanto sa pagpasingki sang tiraniya ni Rodrigo Duterte nga ginpalala sang *Memo-randum Order 32* kag sang *National Task Force-Elcac*.

Ang paghimakas sang mga

mangunguma para sa duta isa ka masingki nga banggi-anay sa mga agalon mayduta-haciendero nga nagresulta sang mga seryoso nga kaso sang pagpamatay sang mga mangunguma kag ginsakdag sang estado nga mga krimen nga nagatuyo nga pahupaon ang pagpamatuk sang Negrosanon nga mangunguma. Sa Barangay Camansi, kon sa diin si Ka Fredo kag Joseph Jimenez ginpamatay, ang mga pamilyang mangunguma dugay na nga nagahimakas para sa ila kinamatarung sa duta kontra sa mga Sola, isa ka manug-agaw duta nga pamilya nga nakabase sa syudad sang Kabankalan, sumugod pa sang dekada 40. Ang mga mangunguma kabisado na kaayo sa pasistang pamaagi sang mga pwersa sang estado pareho sang 47th IB. Nakaagi sila sang madamu nga mga insidente sang pagpangsunog, pagpamatay, grabe nga pagpamahog, kahalitan sa mga pananum kag pagpamatay sang ila kasapatan sa malawig nga tinuig.

Isa ka moderno nga Bonifacio

Si Ka Fredo nagapaambit nga ulihi ang iya pagtubo sa pungsodnon demokratikong kahublagan tungod sa "balatian"—petiburgesya

"Isulong..." sundan sa pahina 4

"Isulong..." halin sa pahina 3

nga arogansya. Ang lubos nga paghalad niya sang iya kabuhi sa demokratiko nga rebolusyon sang banwa kag pag-upod sa matag adlaw nga paghimakas sang masa amu ang iya bulong. Sa pagkama-tuod, indi siya bugalon kag mahapos palapitan. Indi siya arogante sa mga ideolohikal kag pulitikal nga mga talakayan; pirme nga magseguro nga maghatag sang matalum apang simple nga pagpahangup nga mahapos mahangpan sang mga kaupod. Iya ginakumbinsi ang mga kaupod nga hanason ang ila talento kag ikasarang kag maalwan siya sa iya mga mabuligon nga pag-saway kag mga panugyan.

Wala na sang kwestyon, si Kaupod Ericson Acosta isa ka moderno nga Andres Bonifacio. Kaangay kay Bonifacio, ang iya mga binalaybay nagapakita sang mapintas nga kamatuoran sang makasahi nga paghimulos kag pagpigis kag dumuluong nga domi-

nasyon, kag nagabayaw sang dungganon nga kahublagan masa sang mga anakbalhas para sa pungsodnon kag sosyal nga kahilwayan. Kaangay kay Bonifacio, siya ginpatay sa mati-plangon nga pamaagi sang mga bayaran nga soldado sa idalum sa mando sang hakugan nga dumuluong nga gahum kag lokal nga mahimuslanon nga sahi. Ang brutal nga pagpatay sa iya sa kamot sang mga pasistang terorista magasindi lang sang mas mabaskog nga makasahi nga kaakig batuk sa garuk nga mala-kolonyal kag mala-pyudal nga nagahari nga sistema kag magatulod sa pumuluyo sa mada-muan nga isip padulong sa rebolusyonaryong pakig-away kag armado nga paghimakas.

Ang rebolusyonaryo nga kinabuhi ni Ka Fredo, labaw sa tanan, nagapakita sang pagkamakatarungan sang rebolusyon kag nagawasak sang malisyoso nga ginapalapnag sang reaksyunaryo nga estado nga terorista ang mga rebolusyonaryo kag terorismo ang

paglunsar sang rebolusyon batuk sa tiranikal kag mapiguson nga sistema.

Ang bug-os nga Partido kag rebolusyonaryo nga kahublagan sa isla sang Negros naga-upod sa nagalanog nga panawagan sang mga mamumugon, mangu-nguma, pamatan-on, kababaenhan, tawong simbahan, abogado, mamumugon pangkultura kag midya, kag iban pa nga mga sektor, organisasyon, kag mga personahe para sa hustisya kag pasabton ang estado sa kamatayon ni Ka Fredo kag Joseph Jimenez, tig-organisa sang mga mangu-nguma.

Apang, ang pagpangita sang hustisya sa panahon sang mga pasista kag diktador amu ang pagpadayon sang lapnagon kag dasok nga gerilya nga pakig-away sa nagalapad kag nagadalum nga baseng masa. Ang mga natipon nga mga utang nga dugo sang mga pasistang *Armed Forces of the Philippines* (AFP) pagasilutan agud mahatagan sang hustisya ang tanan nga biktima sang paglapas sang tawhanon nga kinamatarung kag dapat pabayron sila sang daku sa pagbalewala sa internasyunal nga makatawo nga layi kag pagsulundan sa inaway.

Amon ginahangkat ang pinakamaayo nga mga anak sang pumuluyo nga sundon ang determinasyon ni Ka Fredo sa pag-alagad sa katawhan kag sa rebolusyon tubtob sa katapusan sang iya kabuhi. Magpatapu sa *New People's Army* kag magpakigbahin sa pagpaabante sang inaway banwa padulong sa bag-o kag mataas nga halintang! **RP**



Pinakamataas nga pagpanginbulahan sa mga baganihan sang masang mangunguma

Felicidad Mercado

Tigpamaba

Pambansang Katipunan ng Magbubukid (PKM) - Negros



NAGAHATAG SANG MATAAS KAG PULANG saludo ang Pambansang Katipunan ng mga Magbubukid (PKM)- Negros para kay Kaupod Ericson Acosta kag Kaupod Joseph Jimenez sa wala pagpangduha-duha kag bug-os panindugan nga pag-alagad sa masang mangunguma ilabi na diri sa isla.

Sa pihak nga gin-utas ang kabuhi ni Ka Ericson sang mga berdugo nga militar, nagapabilin ang iya nga ginbahin nga giya, kinaalam, sinulatan kag militansya sa tanan nga rebolusyonaryong pwersa sang Negros, ilabi na sang mga anakbalhas, agud isulong ang pungsodnon-demokratiko nga rebolusyon.

Indi matago sang mga berdugo nga 94th IB kag 47th IB ang kamatuoran nga ginbaboy kag wala sang kaluoy nila nga ginpatay ang wala ikabato nga si Ka Ericson kaupod ang lokal nga organisador sang mangunguma nga si Joseph Jimenez sadtong kaagahon sang Nobyembre 30, 2022 sa Sitio Makilo, Brgy. Camansi, Kabankalan City. Ginpalapta sang mga pasista nga militar ang peke nga engkwentro agud hinabunan ang brutal nila nga pagpatay sa duha. Luwas pa diri, duha ka adlaw man nga ginuyatan sang militar ang pamilya Francisco, ang tag-iya sang balay nga gindayunan nila ni Ka Ericson kag Ka Joseph.

Matuod nga baganihan sang

masang mangunguma si Ka Ericson. Ginpatay siya samtang ginatungdan ang iya rebolusyonaryo nga hilikuton sa komunidad sang mga mangunguma sa Kabankalan City. Yara siya sa lugar agud manalawsaw sa kahimtangan sang mga mangunguma kag buligan sila sa ila awayan sa duta nga pilit gina-angkon sang pamilya Sola. Kabahin diri ang paghimakas sang mga mangunguma sa Brgy. Camansi, upod si Ka Joseph, kon sa diin makapila na ka beses nila nga nadaog ang kinamatarung sa pagpanag-iya sang duta apang kapintas ang sabat sang mga Sola. Gingamit nila ang mga bayaran nga suldado sang *Philippine Army* kag mga RPA sa pagpamahug, pagpangguba sa mga pananom kag pagpatay sa mga ginsagod nga sapat nga ginagamit sa pagpanguma.

Ginpili ni Ka Ericson nga magbahin kag maghalad sang iya nga kahanas kag kapasidad sa masang anakbalhas nga madugay na nga naga-antus sa idalum sang mala-kolonyal kag mala-pyudal nga sistema sang pungsod. Sa isla sang Negros, nga dagway sang pyudalismo kon sa diin ang malapad nga kadutaan amu ang katubhan kag nahigot ang pangabuhian sang masobra 300,000 nga Negrosanon sa industriya sang kalamay, masyado ka bilidhon ang ubos-oras niya nga paglubog sa komunidad sang mga

pesante agud manalawsaw kag magtuon para mabuyagyag kag mapaathag ang atrasado nga kahimtangan sang masang pesante diri sa isla. Ang iya mga hilikuton kag pag-usisa ang nangin giya para sa mga anti-pyudal nga paghimakas pareho sang pagpataas sang sweldo sa mga asyenda kag paghimakas para sa pagpanag-iya sang duta kag amot sa pagpauswag sang *Comprehensive Agreement on Social and Economic Reforms (CASER)* sang NDFP.

Wala na nakontento ang mga militar sa pag-utod sang kabuhi ni Ka Ericson, ginaguba pa ang dungog sini kag pilit nga ginapalapta ang naratibo nga isa siya ka terorista. Apang sa rebolusyonaryo nga kubay sang mangunguma, ang banas nga ginusooy ni Ka Ericson, pareho sang iban pa nga martir nga ginsulong ang pungsodnon nga kahilwayan, demokratiko nga kinamatarung sang pumuluyo, kalinong, kag pangkatilingban nga hustisya, amu ang pinakahalangdon kag makitawhanon nga hilikuton sa kabuhi—nagahalad sang oras kag kabuhi para sa masang ginahimuslan kag ginapigos. Pareho ni Andres Bonifacio, kon san-o adlaw sang iya pagkabun-ag sadtong ginpatay sila ni Ka Ericson kag Ka Joseph, ginakabig sila

"Pinakamataas..." sundan sa pabina 6

Pinakamataas kag mapula nga pagsaludar kay Ka Ericson Acosta

Mensahe sang Malayang Kilusan ng Bagong Kababaehan (MAKIBAKA)-Negros



"Pinakamataas..." halin sa pahina 5

nga baganihan sang pumuluyo.

Ang ginhimo sang mga mersenaryo nga militar kay Ka Ericson kag Ka Joseph pagpanghadlok lamang sa pumuluyo sang Negros agud puggan ang amon nga paghimakas. Apang ano man ka pilit nila nga panason ang mga kontribusyon ni Ka Ericson kag Ka Joseph, mangin wala pulos lamang ini tungod nakahibalo kami nga mga masang anakbalhas kon sin-o ang matuod nga salot sang amon kabuhi kag kon sin-o ang matuod nga terorista.

Sa ngalan sang rebolusyonaryong kubay sang mangunguma kag katapo sang PKM Negros, bug-os-kusog namon nga ginapakamalaut ang pasista kag berdugo nga 94th IB kag 47th IB kag ginapanawagan ang hustisya para sa wala-kaluoy nga pagpatay kay Ka Ericson kag Ka Joseph. Nagapasalig ang kubay sang PKM Negros nga isakabuhi ang ila maisugon kag palaban nga diwa subongman sa iban pa nga mga rebolusyonaryong martir kag baganihan nga naghalad sang kabuhi para sa demokratiko nga rebolusyon sang banwa. **AP**

MABASKOG NGA GINAKONDENA SANG MAKIBAKA-Negros ang brutal nga pagpatay kay Ka Ericson Acosta upod ang organisador sang mga pesante nga si Joseph Jimenez sang mga pasista nga elemento sang 94th IB kag 47th IB. Si Ka Ericson kag si Joseph ginpatay sadtong Nobyembre 30, 2022 sa Sityo Makilo, Barangay Camansi, Kabankalan City, Negros Occidental.

Para pagwaon nga makatarunganon ang ginlunsar nga operasyon, ginpagwa sang pasista nga 3rd *Infantry Division* MGen. Benedict Arevalo ang gasgas na nga rason nga may nagluntad nga engkwentro. Apang ang kamatuoran, si Ka Ericson kag si Joseph ang gindakop, gintortyur, kag ginbuno-buno antis ginpatay sang mga manug-ihaw nga mga 94th IB kag 47th IB.

Ang kababuyan nga ginbuhat sang 94th IB kag 47th IB kay Ka Ericson kag Joseph isa ka paglapas sa ila kinamatarung sa idalum sang *International Humanitarian Law*. Si Ka Ericson, bilang *resource person* sang NDF, protektado sa idalum sang *Joint Agreement on Safety and Immunity Guarantees* (JASIG) sang GRP-NDFP.

Ang MAKIBAKA-Negros nagahatag sang pinakamataas kag mapula nga pagsaludar kay Ka Ericson Acosta. Bilang rebolusyonaryo, ginhalad ni Ka Ericson ang iya kabuhi kag kalantip sa pagsulat para alagaran ang malapad nga sahing pigos. Ginpasangkad niya ang iya bug-os nga oras kag ihibalo para ma-edukar ang mga sahing pesante kag mamumugon sa padayon nga pagpahimulos sa ila sang mga agalon mayduta paagi sa kontrol sang mga dalagku nga burgesya komprador kag ang mapintas nga gobyerno bilang instrumento.

Ang MAKIBAKA, bilang rebolusyonaryo nga organisasyon sang mga kababaenhan nagapati kag nagaupod sa away ni Ka Ericson sa pagwasak sang tatlo ka ugat—imperyalismo, pyudalismo kag burukrata kapitalismo—agud hilwayon ang pungsod sa kontrol sang mga imperyalista nga padayon nga nagahimulos sa sahing pigos.

Lubos nga ginakasubo sang tanan nga mga rebolusyonaryo nga pwera sang kababaenhan ang kamatayon ni Ka Ericson. Ang kabuhi niya magaserbe nga suga para mag-iwag sang dalan sa tanan nga mga rebolusyonaryo nga magapadayon sang iya aspirasyon kag nagahangkat sa mga kababaenhan nga makigbahin sa armado nga rebolusyon. Paagi sa mapagsik nga pagpamuklat, pag-organisa kag pagmobilisa sang malapad nga masa kag pag-abante sang pungsodnon demokratiko nga rebolusyon nga may sosyalista nga perspektiba lamang maangkon ang hustisya para sa martir nga si Ka Ericson kag organisador sang mangunguma nga si Joseph Jimenez, kag sa tanan nga mga nangin biktima sang inhustisya. **AP**

Magakabuhi ka kaupod namon tubtob sa katapusan!

Pagpasidungog sang Kabataang Makabayan-Negros kay Ka Ericson Acosta

NANGIN PAREHO KA MAN NAMON sadto—batan-on, mabina-tukon, puno sang kapagsik, kag gutom sa rebolusyonaryo nga pagbag-o.

Panahon sang dekada 90 sa kahublagan sang mga pamatan-on kag estudyante, sa pinakatuktok sang ideolohikal nga pagbiak sang mga maka-Wala, nga ikaw nabun-ag bilang aktibista. Sa tunga sang rebisyunistang agos, imo ginpamatud-an ang kakinahanglanon sang pungsodnon demokratikong rebolusyon nga may sosyalistang perspektiba. Paagi sa hugot nga paghakos sa Marxismo-Leninismo-Maoismo kag may malapit nga angot sa masa, imo ginhukas ang imo petiburgesya nga arogansya kag nangin maukod nga aktibista. Bisan sang yara ka pa sa prisohan, ang mga ahente sang estado indi makakurong sang imo rebolusyonaryo nga kainit. Ang madamu nga mga problema kag panghangkat mas pa nga nagpalig-on sang imo panindugan sa paghimakas.

Amo ini nga kamatuoran nga indi mahimutig kag matapna sang AFP kag iban pa nga pasistang elemento: ang pinakamaayo kag pinakamaalam sa mga pamatan-on nagpili nga mangin mga rebolusyonaryo. Ang reaksyunaryong sahi nagaka-imon lang sa aton rebolusyonaryo nga optimismo, kay sa kaidadalman nakahibalo sila nga ang “*status quo*” nga ila ginaprotektahan dunot na sa pinaka-ubod. Ang sosyedad nga aton ginahorma kag ang rebolusyon nga aton ginalunsar, sa pihak nga bahin, madalum nga ginahakos sang masang anakbalhas. Wala sang bisan ano man nga pagpakamalaut ang makapatay sang kalayo sang


nasanagan nga pamatan-on.

Kag ano nga mga dungganon nga mga binalaybay kag mga ambahanon ang nasulat nahanungod sa reaksyunaryo nga sahi? Ang ila mga obra nagpabilin nga wala sang unod kag hupas na. Ang pasistang mga baboy kag ang AFP magadamgo lang sang mga dungganon nga mga mamalaybay kag artista, pareho sa imo, sa ila kubay. Samtang nagamartsa kita padulong sa kadalag-an, may mga problema kag mga sakripisyo, apang may yara man mga ambahanon kag arte nga magabag-o sang aton kahadlok padulong sa kaisog. Ang reaksyunaryong sahi magakopya na lang sang wala ka arte-arte nga mga binutig kag manabaw nga panglingaw. Ang mga ambahanon kag binalaybay nga ginbilin nimo kaban sang manggad para sa tanan nga pamatan-on nga mga aktibista kag mga rebolusyonaryo. Ang imo mga arte mangin kaupod namon samtang ginasumpong kag gina-pangibabawan namon ang mga pangsulod kag pangguwa nga mga banggi-anay.

Apang labaw sa tanan, imo ginpakita nga ang pinakama-baskog nga pagpabutyag sang arte amu ang rebolusyonaryong paghimakas mismo. Ang isa ka artista dapat makahibalo magpamuno sang atake, siling pa ni Ho Chi Minh. Ang mamalaybay, una kag labaw sa tanan, isa ka gerilya. Ang imo dugo nakapinta tubtob sa katapusan sa dungganon nga telon sang pungsodnon demokratikong paghimakas, sa mga pahina sang kasaysayan sang pumuluyo, ang inaway banwa, kon sa diin ikaw ang isa sa mga dungganon nga hangaway.

Ang kamatayon isa ka sakripisyo nga baton na naton sumugod sang ginpili naton ang malawig kag mabudlay nga banas sang rebolusyon. Apang wala ka nagtaliwan sa patag-awayan o inaway. Ang mga pasistang soldado sang 94th kag 47th *Infantry Battalion* wala sang kaluoy nga ginpatay ka nga wala ginhatagan sang tsansa nga makabato. Ang ila pamaagi sa pagtawag sa mga tawo nga pareho sa imo nga “terorista” athag lang nga nagapakita sang ila indi makatawo. Mga wala sila sang pulos nga mga tawo nga wala nagataha sa pamaagi sang gyera. Sila ang mga matuod nga terorista. Kami magapadayon sa panawagan sang hustisya para sa tanan nga wala na sang ikasarang nga magbato (*hors de combat*) nga mga rebolusyonaryo nga ginpamatay sa mga “peke

“Magakabuhi...” sundan sa pahina 8



"Magakabuhi..." halin sa pahina 7

nga inaway", pareho sa imo asawa nga si Kerima Tariman, kag Romeo Nanta (Ka Juanito Magbanua), kaupod mo nga martir sa isla sang Negros.

Wala sang palareho nga kamatayon. Ang imo kamatayon mabug-at para sa masang anak-balhas nga imo gin-alagaran kag sa mga lamharon nga dugo nga imo ginhatagan inspirasyon. Bisan kon nagtampalas sa imo kamatayon ang mga pasistang soldado, indi sila makapalagyo sa katapusan nga pamatbat sang kasaysayan sa ila. Ang ila mga kamatayon wala sang bug-at kag indi signipikante.

Baliskad sa ginasiling sang pasistang soldado, ang imo kamatayon indi patimaan nga ang rebolusyonaryong kahublagan sa Negros nagahuyang na. Sa pagkamatuod, ang imo kamatayon nangin matambok nga duta para sa madamu nga batan-on nga mga rebolusyonaryo nga magtubo.

Ang patriyotiko nga pamatanon sa Negros nagakasubo sa imo pagtaliwan, apang nagpalig-on ini sang amon panindugan nga magpadayon nga pabaskugon kag padalumon ang amon kubay. Ang nagalala nga krisis sa kapitalistang pangkalibutanon nga sistema nagpaluto sang panahon para makahas nga paabantehon ang rebolusyonaryong paghi-

makas. Pareho sa natabo sa kasaysayan, ang Kabataang Makabayan sa isla sang Negros magapadayon nga mangin bubon sang ginatos pa ka mga Pulang hangaway kag prinsipyado nga mga kadre nga magpadayon sang imo ginhimakasan kag ginkamatyan. Sa palaabuton nga mga tinuig, madamu pa sa amon ang magamartsa gikan sa syudad pakadto sa kaumhan agud lab-uton ang dalagkuan nga kadalag-an. Dira sa kabukiran sa isla sang Negros, samtang naga-uyatay sang kamot kaupod ang masang anak-balhas, magakabuhi ka kaupod namon tubtob sa katapusan! **RP**

PAGHANDURAW SA KAUPOD

ni Ka Greta

*Ang imo tingog akon gina-aningal
Malumanay, malig-on kag puno sang kaalam
May pasensiya sa pagpahangup kag pagpamati
Hasta maghiusa sa katuyuan kag handum nga ginamithi.*

*May pagkanugon nga wala nagdugay bilang magkaupod
Sa kalipay kag kabudlay sa bukid sang rebolusyon
Magpaambitanay kag magtuon sa aton mga inagahin
Ululupod nga magtrabaho para sa pagbag-o sang katilingban.*

*Pila pa ka kaupod ang halaran sang luha
Hasta malab-ot ang handum nga ginapangita
Masakit batyagon nga kita ma-ulila
Sang mga kaupod nga sa paghimakas nangin himata.*

*Apang ang aton papel sa kabuhi
Padayunon ang ila ginbayaan nga hilikuton
May kapagsik kag puno sang entusiasmo
Bisan pa mabudlay kag puno sang sakripisyo.*

*Pareho sang suba nga indi mahubsan sang tubig
Bisan madamo pa sang luha nga mag-agas
Indi dapat mahubsan sang pagtinguha
Magpadayon agud sa pagpamigos kag paghimulos mahaw-as.*

